

Courant - Dialuna 13 juli 1964

ARUBA HARDWARE C.V.

1934 ---- 13 juli ---- 1964



ARUBA HARDWARE C.V. AWE TA CUMPLI 30 ANJA

ORANJESTAD, 13 juli. - Awe ta trinta aña pasa cu Aruba Hardware C.V. a ser inscribi oficialmente na Camara di Comercio e Industria di Aruba. Ta un hubileo notable di un dje negoshinan mas bieuw na Oranjestad, cu awe ta worde celebra y cu awe noch lo ser termina cu un gran comemento di directiva y personal na Basi Ruti.

Senjor Bruno Arends, popularmente jama "Brenchi" awor ta worde asisti pa su dos yunan Donny y Elbert, y huntu nan ta forma e directiva di e Sociedad Comanditaria. En realidad senjor Brenchi tin 43 anja den negoshi caba. Tempo cu e la cuminsa no tabata conoci ainda, bicicleta di tres speed, lavaplatu di stainless steel y otro aparatonan di lujo. E articulonan mas bendi tabata esnan mas necesario manera, grendel pa bentana, scharnier, clabo, y articulo pa piscamento, manera, cabuja, lona etc. Tampoco e tabata den mesun edificio di actual. E prome piedra di su carrera senjor Brenchi Arends a pone den e edificio cu ta keda pabao di esun cu e ta ocupa actualmente na e otro skina di Wilhelminastraat y Ooststraat. Ey e tabatin su negoshi den provision, seda, catuna, -scharnier, verf, te hasta prenda. Pues un tienda di antes, na unda tabatin e articulonan mas necesario pa uso diario. Ta hopi despues Brenchi a tuma e desicion pa bai especialisa den ferreteria, y a pasa e negoshi di provision den man di otro hende. Calender tabata marca 13 di juli 1934, ora cu Brenchi a worde notifica cu su negoshi Aruba Hardware Store (manera cu e nomber tabata promer) a worde registra oficialmente na Camara di Comercio e Industria di Aruba. E negoshi a worde stableci den e edificio actual, cu poco promer a caba di haci uso pa basta tempo como oficina di gezaghebber. L. Wagemaker y tambe como oficina di Bevolking cu tabata hospeda ey den.

BON "BAAS"
E negoshi a cuminsa cu tres hende: Brenchi mes, kende tabata worde yuda door di su swa Damian Wever, kende tambe ta celebrando su hubileo di trinta

anja den servicio awe, y un dama. Otro empleada cu a traha hopi anja serca Brenchi, kende su nomber mester a worde mencio-

na ta senjora Rosa Romano, un di mi "mehor bendedornan" cu mi a jega di conoce, manera Brenchi a expresa su mes. Despues a sigui Jacobo Wever kende actualmente tin 15 anja den servicio y tambe Jossy Franken,

kende na edad di 14 anja a cuminsa traha na Brenchi y cu awe tambe ta recorda e hecho di a cumpli 15 anja den servicio.

Sin duda e cantidad di anjanan di servicio ta muestra dos cos: bon empleadonan, pero tambe un bon baas. E negoshi tabata menos di mitar di loke e ta awor. Segun anjanan tabata bai tabata necesario pa haci e lugar mas grandi. Actualmente nan tin mas di 1800 meter cuadra na uso pa e negoshi y deposito, y senjor Arends tin 18 personal den servicio awor.

Na 1964 Aruba Hardware Store durante un concurso di negoshinan na Aruba, cu a worde organisa pa Publicidad Record, un compania di publicidad estranhero, e negoshi di Brenchi a worde nombra como e mehor ferreteria na Aruba. E nomber aki Aruba Hardware C.V. kier mantene pa semper, pesey nanta planeando constantemente den progreso y mehoracion dje negoshi. Actualmente construcion di expansion ta den un estadio basta avanza, y pronto nan ta spera di por inaugura e parti nobo, y asina crea mas espacio pa exhibicion di e articulonan, organisando seccionnan di cada articulo, pa mas comodidad y mehor servicio na e clientenan.

Na e agencianan di mas importante di senjor Arends ta pertenece hermentnan marca Stanley, y -

verf marca Sapolin y Woosley. Tambe nan tin e agencia pa jabinan di remote-controle. Un jabi cu por habri sin lamta for di bo stoel, controla pa un boton electrico, specialmente na ocasion di e trinta aniversario di Aruba Hardware C.V. durante e siman aki for di dialuna te diasabra, lo tin un regalo especial pa tur cliente den forma di 10 porciento rebaha ariba tur articulo.